



MEMORIA RELATIVA AOS ANTECEDENTES, RAZÓN DE OPORTUNIDADE E OBXECTIVOS PERSEGUIDOS COA APROBACIÓN DUN PLAN ESPECÍFICO DE SUBVENCIÓNS A CONCELLOS TURÍSTICOS CON ELEVADO INCREMENTO POBOACIONAL, PARA A CONTRATACIÓN DE AUXILIARES DE POLICÍA LOCAL DURANTE A TEMPADA DE VERÁN DE 2021

O Decreto 214/2020, do 3 de decembro, polo que establece a estrutura orgánica da Vicepresidencia Primeira e Consellería de Presidencia, Xustiza e Turismo (DOG núm. 253, do 17 de decembro), atribúelle a este departamento, a elaboración, proposta e execución da política do Goberno Galego en materia de Administración Local así como as competencias en materia de asistencia á Administración Local e o fomento das liñas de colaboración coas Entidades Locais.

No mesmo Decreto de estrutura orgánica, o seu artigo 22 establece que é competencia da Dirección Xeral de Administración Local, as relacións coas entidades locais e coas demais institucións relacionadas co ámbito do poder local, así como o fomento das liñas de colaboración coas entidades locais galegas no referente á convocatoria e execución das subvencións a elas destinadas.

Segundo dispoñen os artigos 25 e 26.1 da Lei 7/1985, do 2 de abril, reguladora das bases do réxime local, e os artigos 80 e 81 da Lei 5/1997, do 22 de xullo, de Administración Local de Galicia, os concellos deberán prestar á súa cidadanía os servizos públicos que contribúan a satisfacer as necesidades e aspiracións da veciñanza.

A Lei orgánica 2/1986, do 13 de marzo, de forzas e corpos de seguridade, sinala que lles corresponde ás comunidades autónomas coordinar as actuacións das policía locais dentro do seu ámbito territorial. Co obxectivo de coordinar as policía locais do seu territorio, obter un funcionamento homoxéneo destes corpos e acadar unha acción conxunta e eficaz no sistema de seguridade pública galega promulgoouse a Lei 4/2007, do 20 de abril, de coordinación de policía locais de Galicia, que veu substituír á Lei 3/1992, do 23 de marzo, e na que se prevé que nos concellos con aumento notorio de poboación en tempadas determinadas poderase incrementar transitoriamente o seu cadro de persoal mediante a contratación de persoal con funcións de auxiliar de policía

Pola súa vez, a Lei 5/1997, do 22 de xullo, de Administración local de Galicia, establece que as entidades locais galegas e a Xunta de Galicia adecuarán a súa actuación aos principios de colaboración, cooperación e auxilio que puidesen precisar conxunturalmente para o eficaz cumprimento das súas tarefas; entre estas, a de seguridade en lugares públicos.

No marco xurídico descrito, a Xunta de Galicia ten entre os seus obxectivos potenciar e apoiar a prestación de servizos por parte dos nosos concellos como Administración máis próxima aos administrados; por este motivo atopa de interese colaborar cos concellos turísticos de Galicia no reforzamento da vixilancia e da seguridade durante a tempada de verán, aumentando a eficacia dos seus corpos de policía local no desenvolvemento das funcións que lle son propias. Con esta colaboración préstase asemade un apoio inequívoco ao mantemento dun importante tecido socioeconómico e da prestación de servizos e á mellora da convivencia no ámbito local, que é o máis próximo e que incide de xeito máis directo na cidadanía. Esta colaboración concrétese no apoio á contratación de persoal auxiliar de policía local durante a tempada de verán, de xeito que se preste un mellor servizo á poboación que neses concellos reside e, en termos xerais, ao conxunto da poboación de Galicia.

As dificultades para afrontar os compromisos económicos que o reforzamento dos cadros da policía local durante a tempada de verán representan para as facendas municipais únense á necesaria aplicación de criterios de eficiencia na asignación dos recursos públicos, nun contexto de estabilidade orzamentaria que atinxe a todas as administracións públicas, sen que a Administración local constitúa unha excepción neste sentido. Neste escenario, a Xunta de Galicia, no marco do fomento das liñas de colaboración coas entidades locais, apoia activamente o significativo esforzo en materia de seguridade cidadá e vixilancia que os concellos deben realizar, esforzo directamente relacionado co notorio incremento poboacional de carácter estacional do que é representativo o número de prazas de aloxamento con que estes concellos contan.

Este obxectivo común refórzase no contexto actual da crise sanitaria causada pola Covid-19 no que, a medida que se van determinando as condicións e requisitos máis acaídos ás circunstancias para volver a ocupar os espazos públicos, resulta evidente que todas as administracións deben adoptar e implantar medidas de seguridade e asemade facer un seguimento da súa observancia e cumprimento. Nestas accións de protección da seguridade da cidadanía, os corpos de policía desempeñan unha importante labor polo que a Xunta de Galicia apoia mediante este plan específico a contratación do persoal auxiliar de policía local.

O Decreto 193/2011, do 6 de outubro, polo que se regulan especialidades nas subvencións ás entidades galegas, de aplicación ás subvencións concedidas pola Administración xeral da Comunidade Autónoma de Galicia cuxos beneficiarios sexan as entidades locais galegas, contempla que o órgano competente para a concesión de subvencións poida elaborar un plan específico para liñas especiais de subvencións de carácter singular dirixidas ás entidades locais cando existan razóns de interese público, social, humanitario ou outras debidamente xustificadas que dificulten a súa convocatoria e así se recolla no plan.

En atención ao anteriormente exposto, estimando que concorren as circunstancias de interese público, polo que supón de apoio en materia de seguridade cidadá e vixilancia e de contribución ao mantemento dun importante tecido socioeconómico e da prestación de servizos, redundando todo iso na mellora da vida local que é o ámbito máis próximo e que incide de xeito máis directo na vida da cidadanía, elabórase o Plan Específico de Subvencións a concellos de Galicia para a contratación de auxiliares de policía local durante a tempada de verán 2021.

As subvencións irán destinadas a aqueles concellos turísticos de Galicia con elevado incremento poboacional, que vaian realizar contratacións de auxiliares de policía local para o reforzo do corpo durante a tempada de verán.

A selección dos concellos subvencionados realízase con base no cumprimento dos seguintes requisitos:

1. Que teñan unha poboación igual ou superior a 5.000 habitantes, segundo as cifras oficiais de poboación de 2020, ofrecidas polo Instituto Galego de Estatística desde o padrón municipal de habitantes.
2. Que experimenten na tempada de verán un incremento estacional de poboación, medido polo número de prazas de aloxamento (hoteis, pensións, albergues turísticos, establecementos de turismo rural, apartamentos turísticos, campamentos de turismo e vivendas turísticas), cun mínimo de 1.000 prazas. Para a determinación deste requisito utilizáronse os últimos datos facilitados polo Instituto Galego de Estatística, procedentes da Axencia Turismo de Galicia, referidos ao ano 2021.
3. Que teñan declaración de municipio turístico galego, de conformidade co establecido no Decreto 32/2015, do 19 de febreiro, polo que se regula a declaración de municipio turístico (DOG núm. 41, do 2 de marzo).
4. Que contén cun corpo de policía local, segundo os datos facilitados pola Dirección Xeral de Emerxencias e Interior.
5. Que participen no proceso selectivo unitario para a cobertura de postos de auxiliares de policía local, convocado pola Orde do 29 de marzo de 2021, polo que se aproban as bases xerais reguladoras e se convoca proceso selectivo para a provisión, mediante contrato laboral temporal, de postos de auxiliares de policía local (DOG núm. 65, do 8 de abril).

Alternativamente, que teñan convocados procesos selectivos para a cobertura de postos de auxiliares de policía local durante 2021 e remiten as bases reguladoras para os efectos da emisión de ditame pola Dirección Xeral de Emerxencias e Interior, segundo o previsto no artigo 16 da Lei 4/2007, do 20 de abril, de coordinación de policía locais.

Tamén se inclúen aqueles concellos adheridos ao convenio xeral de procesos unitarios para o acceso ás diferentes categorías dos corpos da policía e auxiliares de policía local e contrataron persoal auxiliar de policía local neste ano 2021, segundo informe da Axencia Galega de Seguridade Pública.

De conformidade cos requisitos indicados, resultan seleccionados os 14 concellos que se relacionan no cadro inserido a continuación, que serán os destinatarios das axudas recollidas neste plan, co fin de apoiar as contratacións realizadas de persoal auxiliar de policía local durante a tempada de verán, de xeito que se preste un mellor servizo á poboación que neles reside e indirectamente ao conxunto da poboación de Galicia en xeral.

Concello	Total prazas aloxamento	Poboación	% prazas sobre total poboación	Declaración de concello turístico	Corpo Policía Local	Núm. efectivos corpo policía	Procesos selectivos
Baiona	3.960	12.129	32,65%	31/05/1999	SI	15	BI
Cambados	1.504	13.721	10,96%	03/01/2000	SI	17	PSU
Cangas	3.295	26.582	12,40%	15/06/2001	SI	15	PSU
Grove, O	8.804	10.518	83,70%	03/01/2000	SI	13	PSU
Guarda, A	2.391	10.025	23,85%	15/06/2001	SI	5	PSU
Miño	1.485	6.277	23,66%	10/10/2000	SI	4	PSU
Nigrán	3.155	17.745	17,78%	24/08/2004	SI	17	Listas
Padrón	1.104	8.366	13,20%	28/02/2000	SI	10	Listas
Pobra do Caramiñal, A	1.331	9.318	14,28%	10/08/2004	SI	7	Listas
Poio	3.384	17.073	19,82%	02/06/2000	SI	12	PSU
Ribeira	2.382	26.848	8,87%	08/10/2001	SI	22	Listas
Sanxenxo	26.585	17.414	152,66%	31/05/1999	SI	26	PSU
Tui	1.084	17.323	6,26%	28/02/2000	SI	10	BI
Vilagarcía de Arousa	1.776	37.565	4,73%	24/08/2004	SI	42	PSU

Estes concellos deberán cumprir ademais cos seguintes requisitos, que acreditarán con carácter previo á formalización do convenio:

- Teren remitidas as contas do exercicio orzamentario 2019 ao Consello de Contas de Galicia. Este requisito deberá estar cumprido o 31 de maio de 2021, é dicir, antes do comezo do período subvencionable.
- Non estaren incurso en ningunha das circunstancias previstas no artigo 10.2 e 10.3 da Lei 9/2007, do 13 de xuño, de subvencións de Galicia.

Para a consecución do obxectivo a que se refire esta orde, a Vicepresidencia e Consellería de Presidencia, Administracións Públicas e Xustiza destinará ata un límite de CENTO CORENTA E CINCO MIL EUROS (145.000,00 euros), con cargo á aplicación orzamentaria 05.23.141A.460.0, (C.P. 2015 00095), correspondente aos orzamentos xerais da Comunidade Autónoma de Galicia para o ano 2021, distribuídos do seguinte xeito:

- Concellos en que o número de prazas de aloxamento represente máis do 50% sobre o total de poboación: 20.000,00 € (Sanxenxo e O Grove)
- Concellos en que o número de prazas de aloxamento represente máis do 20% sobre o total de poboación: 12.000,00 € (Baiona, A Guarda e Miño)
- Concellos en que o número de prazas de aloxamento represente máis do 15% sobre o total de poboación: 10.000,00 € (Poio e Nigrán)
- Concellos en que o número de prazas de aloxamento represente menos do 15% sobre o total de poboación: 7.000,00 € (Cambados, Cangas, Padrón, A Pobra do Caramiñal, Ribeira, Tui e Vilagarcía de Arousa)

Con base nos anteriores criterios de distribución, os importes das subvencións asignadas a cada concello son os que se relacionan no cadro seguinte:

Concello	Total prazas aloxamento	Poboación	% prazas sobre total poboación	Importe subvención
Sanxenxo	26.585	17.414	152,66%	20.000,00
Grove, O	8.804	10.518	83,70%	20.000,00
Baiona	3.960	12.129	32,65%	12.000,00
Guarda, A	2.391	10.025	23,85%	12.000,00
Miño	1.485	6.277	23,66%	12.000,00
Poio	3.384	17.073	19,82%	10.000,00
Nigrán	3.155	17.745	17,78%	10.000,00
Pobra do Caramiñal, A	1.331	9.318	14,28%	7.000,00
Padrón	1.104	8.366	13,20%	7.000,00
Cangas	3.295	26.582	12,40%	7.000,00
Cambados	1.504	13.721	10,96%	7.000,00
Ribeira	2.382	26.848	8,87%	7.000,00
Tui	1.084	17.323	6,26%	7.000,00
Vilagarcía de Arousa	1.776	37.565	4,73%	7.000,00
				145.000,00

A aprobación do Plan específico de subvencións a concellos turísticos con elevado incremento poboacional, para a contratación de auxiliares de policía local durante a tempada de verán 2021 require os informes previos da Asesoría Xurídica, da Dirección Xeral de Planificación e Orzamentos e da Intervención Delegada.

Santiago de Compostela, na data da sinatura electrónica

A directora xeral de Administración Local

Natalia Prieto Viso
(documento asinado dixitalmente na marxe)